



KENYATAAN MEDIA STATISTIK TENAGA BURUH, MALAYSIA, FEBRUARI 2024

Kadar pengangguran Februari kekal pada 3.3 peratus, mencatatkan bilangan penganggur yang lebih rendah iaitu pada 567.0 ribu orang

PUTRAJAYA, 08 April 2024 – Kadar pengangguran Februari kekal pada 3.3 peratus, mencatatkan bilangan penganggur yang lebih rendah iaitu pada 567.0 ribu orang, Jabatan Perangkaan Malaysia (DOSM) melaporkan pada hari ini dalam siaran **Statistik Tenaga Buruh, Malaysia, Februari 2024**. Statistik ini memperihalkan kedudukan penawaran buruh berdasarkan Survei Tenaga Buruh yang dilaksanakan oleh DOSM.

Mengulas prestasi keseluruhan bagi bulan Februari 2024, Ketua Perangkawan Malaysia, Dato' Sri Dr. Mohd Uzir Mahidin berkata, "Pada Februari 2024, kedudukan tenaga buruh kekal stabil selaras dengan perkembangan aktiviti ekonomi semasa, merekodkan trend positif yang berterusan dalam bilangan penduduk bekerja manakala bilangan penganggur menurun sedikit. Oleh itu, bilangan tenaga buruh pada bulan tersebut terus merekodkan peningkatan bulan ke bulan, dengan pertambahan sebanyak 0.1 peratus kepada 17.07 juta orang (Januari 2024: 17.05 juta orang). Kadar penyertaan tenaga buruh bulan Februari kekal pada 70.2 peratus seperti yang direkodkan pada bulan sebelumnya."

Selain itu, Dato' Sri Dr. Mohd Uzir Mahidin menyatakan bahawa bilangan penduduk bekerja terus meningkat, dengan kenaikan bulan ke bulan sebanyak 0.2 peratus kepada 16.51 juta orang (Januari 2024: 16.48 juta orang). Sebaliknya, bilangan penganggur pada bulan tersebut terus berada dalam trend menurun, dengan penurunan kecil iaitu sebanyak 0.1 peratus kepada 567.0 ribu orang (Januari 2024: 567.3 ribu orang), mencatatkan kadar pengangguran 3.3 peratus seperti pada bulan sebelumnya.

Menjelaskan lebih lanjut mengenai kedudukan guna tenaga, Ketua Perangkawan Malaysia berkata, "Daripada jumlah penduduk bekerja pada Februari 2024, 75.2 peratus berada dalam kategori pekerja, yang merekodkan sedikit peningkatan iaitu sebanyak 0.1 peratus kepada 12.41 juta orang (Januari 2024: 12.39 juta orang).

Begitu juga, kategori penduduk bekerja sendiri berada pada trend meningkat, naik sebanyak 0.3 peratus kepada 3.02 juta orang (Januari 2024: 3.01 juta orang)."

Dari segi sektor ekonomi, sektor Perkhidmatan terus mencatatkan peningkatan dalam bilangan penduduk bekerja, terutamanya dalam aktiviti Perdagangan borong & runcit; Perkhidmatan makanan & minuman; dan Pengangkutan & penyimpanan. Sektor Pembuatan, Pembinaan, Perlombongan & pengkuarian, serta Pertanian juga menunjukkan pertambahan dalam bilangan penduduk bekerja pada Februari 2024.

Mengulas lanjut mengenai situasi pengangguran pada Februari 2024, Dato' Sri Dr. Mohd Uzir Mahidin berkata, "Penganggur aktif atau mereka yang bersedia untuk bekerja dan aktif mencari pekerjaan, merangkumi 79.8 peratus daripada jumlah penganggur. Kumpulan ini merekodkan penurunan marginal 0.04 peratus kepada 452.4 ribu orang (Januari 2024: 452.5 ribu orang). Dalam kalangan penganggur aktif, mereka yang menganggur kurang daripada tiga bulan meliputi 61.6 peratus manakala mereka yang berada dalam pengangguran jangka panjang melebihi setahun adalah sebanyak 6.7 peratus. Pada masa yang sama, mereka yang percaya bahawa tiada pekerjaan tersedia atau penganggur tidak aktif berkurang sebanyak 0.1 peratus kepada 114.6 ribu orang (Januari 2024: 114.7 ribu orang)."

Kadar pengangguran dalam kalangan belia berumur 15 hingga 24 tahun pada bulan tersebut kekal tidak berubah iaitu pada 10.6 peratus, dengan 306.6 ribu penganggur belia (Januari 2024: 10.6%; 306.8 ribu orang). Manakala, kadar pengangguran bagi belia berumur 15 hingga 30 tahun adalah 6.6 peratus, mencatatkan bilangan penganggur belia seramai 434.8 ribu orang (Januari 2024: 6.7%; 439.7 ribu orang).

Mengenai kumpulan tidak aktif, terdapat sedikit penurunan iaitu sebanyak 0.01 peratus yang direkodkan dalam bilangan penduduk di luar tenaga buruh pada bulan Februari 2024 berbanding bulan sebelumnya, dengan jumlah seramai 7.23 juta orang (Januari 2024: 7.23 juta orang). Sebab utama penduduk berada di luar tenaga buruh adalah berikutan kerja rumah/ tanggungjawab keluarga, merangkumi 42.5 peratus, diikuti oleh sebab bersekolah/ latihan sebanyak 41.0 peratus.

Mengakhiri kenyataan tersebut, sejajar dengan kedudukan ekonomi negara yang stabil, kebanyakan sektor ekonomi diunjurkan berkembang pada tahun 2024, dengan sektor Perkhidmatan dan Pembuatan akan menjadi pemacu utama kepada pertumbuhan keseluruhan. Di samping itu, permintaan yang semakin meningkat terhadap pekerjaan profesional dalam perkhidmatan perniagaan dan pentadbiran dapat dilihat susulan lebih banyak firma melancarkan platform e-dagang, menggunakan media sosial untuk pemasaran, meneroka analisis data untuk kecekapan, dan mengamalkan sistem automasi dan digital. Permintaan domestik yang kukuh, berikutan perbelanjaan isi rumah yang berdaya tahan pada musim perayaan yang akan datang, juga dijangka menyokong aktiviti pengambilan pekerja. Oleh itu, kedudukan pasaran buruh dijangka terus berkembang pada bulan-bulan

berikutnya, disokong oleh permintaan yang berterusan terhadap guna tenaga ke arah ekonomi yang lebih baik.

Data siri masa dan maklumat lanjut mengenai pasaran buruh boleh diperolehi melalui papan pemuka Data Interaktif Pasaran Buruh Malaysia (MyLMID). Untuk maklumat lanjut, sila layari <https://mbls.dosm.gov.my/mylmid/> atau imbas kod QR di bawah.




Jabatan Perangkaan Malaysia (DOSM) telah melancarkan OpenDOSM NextGen sebagai medium yang menyediakan katalog data dan visualisasi bagi memudahkan pengguna menganalisis pelbagai data dan boleh diakses melalui portal <https://open.dosm.gov.my>.


DOSM akan menjalankan Banci Pertanian pada tahun 2024. Mohon layari <https://www.myagricensus.gov.my/> untuk maklumat lanjut. Tema adalah “Banci Pertanian, Kunci Kemajuan Pertanian.”

Kerajaan Malaysia telah mengisytiharkan Hari Statistik Negara (MyStats Day) pada 20 Oktober setiap tahun. Tema sambutan MyStats Day adalah “Statistik Nadi Kehidupan”.

Carta 1: Penduduk bekerja, Malaysia, Februari 2021 - Februari 2024



Carta 2: Pengangguran, Malaysia, Februari 2021 - Februari 2024



Dikeluarkan oleh:

**PEJABAT KETUA PERANGKAWAN
JABATAN PERANGKAAN MALAYSIA
08 APRIL 2024**